

DISSERTATIO INAUGURALIS MEDICA,
DE
CONVENIENTIA
MEDICINÆ

CUM
THEOLOGIA PRACTICA,

Quam
AUSPICE DEO PROPITIO,
Ex Consensu atque Auctoritate Gratiossæ Facultatis Medicæ,
IN ALMA REGIA FRIDERICIANA,

P R Æ S I D E

DN. D. MICHAELE ALBERTI

SACR. MAJ. REG. BORUSS. AULICO ET CONSIST. MAGDEB.
CONSILIARIO, MED. ET PHILOS. NATUR. PROFESSORE
PUBLICO ORDINARIO, ETC.

DECANO H. T. SPECTATISSIMO,

Domino Patrono, Præceptore ac Promotore suo omni honoris cultu prosequendo

PRO GRADU DOCTORIS

SUMMISQUE IN MEDICINA HONORIBUS ET PRIVILEGIIS
LEGITIME IMPETRANDIS,

HORIS LOCOQUE CONSUETIS

ANNO MDCCXXXII. D. DECEMBER

PUBLICÆ AC PLACIDÆ ERUDITORUM VENTILATIONI SUBJICIET

AUCTOR RESPONDENS

JOACHIMUS ABRAHAMUS Mothe,

CHRISTIANOP. LUS.

HALÆ MAGDEBURGICÆ,
TYPIS JOH. CHRISTIANI HENDELI, ACAD. TYPOGR.



Q. D. B. V.



Pietatem ad omnia utilem esse, non solum Sacrae nos docent paginae, verum etiam experientia per omnes hominum actiones consulta confirmat, & ratio brutae animalitatis jugo exuta corroborat. Si enim etiam consideremus eos qui lumine coelitus revelatarum veritatum caruerunt, nonne & ipsi Ethnici ex legibus, quas natura & sana ratio ipsis suppeditarunt, monent, juste pie atque honeste esse vivendum? nonne ipsa multorum vita Philosophorum his legibus respondet, quantum quidem ipsis licuit, sola ratione ducti, in via progredi recti? Nos jamjam non vagabimur ultra nostros circulos, nec evolvemus omnes utilitates, quae pietatem excipiunt in hoc aevio, nec quale praemium ipsam sit insecuturum in ea, quae post interitum rerum mundanarum succedet vita, perscrutabimur, quas meditationes

Theologorum indagationi relinquimus: sed pietatis utilitatem in foro medico præsentī tractatione duntaxat considerabimus. Ast nec hic in amplissimum medicinæ campum excurrere placet; verum illorum tantummodo reminiscemur emolumentorum, quæ in Medicinam, ut vocant, Clinicam, seu Praxin Medicam ex pietate redundant. Hoc respectu notum est inter omnes, verum ac solitarium praxeos medicæ finem esse conservationem illæ sæ, ac restitutionem deperditæ mortalium sanitatis. Ultima strictiori praxeos adpellatione triplex ordo hominum in plerisque morbis se nobis sistit: adest enim subjectum morbi seu æger; adest medicus; adsunt illi qui officiis ægri inserviunt. De medico an debeat esse pius, non fere est, cur quæramus, cum ipsa res affirmativam defendat. Etenim ipsi olim in spissis ethnicismi tenebris constituti Philosophi ac Medici τὸ Θεῖον in multis morbis meditati, admirati & venerati sunt, adeo ut *Hippocr. Libr. de dec ornam.* profiteatur, quod Medicina Deos reverenter habeat, quia multa in morbis moliantur. Sed nos de hoc Medici præcipuo requisito, quod & ipsi & ægroto utilitatem affert, non agemus, potius inter illos qui de hac re prolixius commentati sunt, *Dn. Præsidis* varias *Dissert. de Conscientia & religione Medici &c.* eundem in *Medicina Theologica*; *Detardingii Tr. de pietate medici* & *Bobnium de Officio med. dupl. P. I. Cap. IV.* commendamus.

Quid vero de Adstantibus judicandum? Idem sane. Prætermisiss enim causis generalioribus, proximius

ximius ex ipso officio quod in se susceperunt eorum pietatis necessitatem & utilitatem medicam apparere existimo. Siquidem, quando quispiam dolorum acerbia ac vehementia ita vexatur, ut perpetuo jetitabundus nullum quietis locum reperire queat, cui inter continuos ejulatus ac clamores levissima quæque stomachum movent: quæ damna, quales dolorum exacerbationes experietur, si adstantes majori, quam ipse, laborant impatientia? Quid valeat bonum in morbis regimen, minime quidem huius loci est differere, ast, quisnam quæso majori fidelitate hoc regimen dirigere poterit, quam probus, qui proximum suum sicuti se ipsum diligit? Ex hisce, ulteriorique meditatione facile elucescet, quanta emolumenta & ex parte Medici & ex parte adstantium in curandis ac allevandis mortalium ægritudinibus pariat pietas. Præter hæc omnia vero ipsius ægroti pietas optimum ei erit scutum atque præsidium, quo non solum sese in sanitate conservare, verum etiam a morbis præservare, & tandem ipsos morbos si non penitus debellare, saltem leviores & tolerabiliore reddere poterit. Et hæc materia ansam mihi dedit conscribendi Dissertationem Inauguralem, idque eo magis, cum me de reali Nexu & Convenientia Theologiæ & quidem præcipue Practicæ cum Medicina Practica reddiderit quam certissimum, quodque prius studium ob impedimenta nullo modo removenda, non quidem amplius publice profiteri, attamen maxima animi reverentia ac veneratione veritates divinas in illo asservatas æta-

tem colere mihi concessum sit. Faxit itaque Deus, summus rerum arbiter, ut hæ meæ primitiæ eum, quem intendunt, adipiscantur finem.

§. I.

PRiusquam igitur ipsam aggrediar tractationem, præmittam aliquam tituli & notionum sub eo contentarum explicationem. Quid sub medicina intelligam, cuilibet cognitum erit, nempe illam rationalem ac judiciosam artem quæ versatur circa sanitatem hominum conservandam, a morbis præservandam, & læsam restituendam: Theologia vero Practica in eodem a me sumitur significato, quo pietatem in antedictis adhibuimus, ut adeo Theologia practica ac pietas mihi sint synonyma: est vero pietas ille habitus, quo vitam ac actiones nostras secundum voluntatem & leges divinas instituere summo allaboramus studio. quomodo vero iste habitus non nisi per auxilium divinum ac Spiritus S. illuminationem acquiratur, nos non explicaturi Theologis relinquimus: interim *Celeberrimus B. Buddeus in Elem. Philos. Instr.* jam de Philosophia practica *C. I. §. VII. p. 5.* egregie asserit: quod per humani generis conditionem finem suum sine lumine revelationis assequi nequeat. Hanc pietatis significationem veteres philosophi ethnici per nomen sapientiæ & virtutum indigitare voluerunt, ignari vero genuini omnium virtutum fontis, nonnulli quidem illorum aliquando tales se præstiterunt, quales mireris, si modo vera, quæ tam mirifice de illis ab auctoribus prædicantur laudanturque; nihilo tamen minus fa-
ten.

tendum est, vel, tantummodo pravos affectus mutasse & superasse cum aliis itidem malis, utpote voluptatem cum superbia, & sic porro; vel, certe eo non pervenisse in-
tramite virtutum, quo illuminatione divina ducti, potuif-
sent penetrare. attamen omnino non spernendos ex na-
turalis moralitatis usu atque exercitio perceperunt fru-
ctus, quod scil. concernit corpus ejusque conservatio-
nem, sicuti *Plato de Repl. L. III.* quoque testatus est, di-
cens: Mihi quidem videtur animus bene affectus vi sua
corpus, quoad fieri potest, optimum reddere. Interea,
cum iis, quas ex naturali vi consequuti sunt, virtutibus
id effecerunt, ut magnas inde in sanitate sui corporis per-
ceperint utilitates, quanto magis ii, qui naturales hasce
virtutes per divinam illuminationem longe magis excolu-
erunt, ac emendarunt, præ aliis sanam tranquillam & lon-
gam vitam, quam ex innato quasi instinctu omnes mor-
taliū tam anxie anhelamus, sibi polliceri poterunt.

§. II.

Ast non solum sanam conservabunt vitam, sed, licet
etiam nonnunquam morbis infestentur, quos penitus evi-
tare culpa peccati haud permittit, omnium facillime do-
lores, morbos, mortem ipsam perferunt & superant Pii,
quod maxime simul patet ex facta comparatione & consi-
deratione naturæ humanæ corruptæ, & confectariorum,
quæ quotidie exinde videmus, noxiorum in statum corpo-
ris humani, tam sanum, quam morbosum. Hoc penitus exa-
minaturus, tribus membris considerabo pietatis cum me-
dicina convenientiam; primo scilicet, in conservanda sa-
nitate; secundo in præservatione a morbis; & tertio in
perferendis & curandis morbis.

§. III.

§. III.

Sanitas ergo nihil aliud est, quam conveniens actionum homini propriarum administratio per partes organicas integras & illæfas. Actiones hæ vulgo functiones nominatæ, distinguuntur in vitales, animales & naturales. Quarum causa efficiens est natura humana, cui almus creator potentiam dedit corpus suum movendi, a corruptione, ad quam perpetuo inclinat, præcavendi, & ab injuriis externis defendendi. quia vero hosce fines absque mediis obtinere non potest: causæ instrumentales ac media, quibus sanitatem sui corporis conservare possit, sunt res illæ non naturales dictæ, legitimo usu ac ordine adhibitæ. Quemadmodum itaque hisce duobus momentis sanitas mortalium conservari potest, anima in corpore sana, & legitimo rerum non naturalium usu: ita etiam horum inordinatus ac irregularis status inter maxime arduas ac efficaces causas morborum referendus est. Plurimæ vero harum causarum ita sunt comparatæ ut earum legitimus ac illegitimus usus in libera hominum voluntate sit positus. Et hic mox apparet fundamentum, quod sæpius ipse homo, uti suæ fortunæ ita & sanitatis faber sit, salvo tamen generali divino rerum humanarum moderamine.

§. IV.

Quod ergo animam attinet, experientia constat, ipsam vitam & sanitatem ita esse comparatam uti illam: Conf. *Dn. Præsid. Diss. de Mente sana in corpore sano; & de morum & morborum nexu.* quod si hæc tranquilla atque moderata sit, inveniemus, sanitatem etiam esse tranquillam, ac omnes actiones humanas moderate procedere, non solum in statu sano verum etiam ipso morbo: con-

contra vero si anima aut nimium vehemens, præceps, aut timida, meticulosa, diffidens, aut lassæ, pigraque existit, omnes motus ita pariter erunt comparati. Quum vero ulterius experientia edoceamur eam sanitatem esse optimam, qua motus ac actus vitales in temperato moderamine ac iusta tranquillitate peraguntur: sponte sequitur, quod tranquillitas animæ eximium momentum in conservanda ac restituenda conferat sanitatem. Jam vero, quis frui potest hoc veterum Philosophorum quæsito, aut non invento summo bono? unico hoc innititur fundamento, quod est pax cum Deo: hac nullus philosophus, nullus naturalis homo gaudere potest, nisi pius, cui per fidem in Christum Salvatorem remissa sunt peccata. Hinc patet eximius nexus pietatis cum medicina: quicumque enim pius est, ei remissa sunt peccata, is cum Deo pacem habet, hinc perpetua gaudet animi tranquillitate & exinde eximio sanitatis vigore. de hac re egregias meditationes sup-
peditat *B. Richter* *Tr. von Erkenntniß des Menschen P. I. C. XIX. p. 455. seqq.*

§. V.

Hæc igitur tranquillitas nunquam est naturalis, sed per divinam obtinenda gratiam; sine illa vix fieri potest, quin ipsa anima, quæ alias conservatrix vitæ ac sanitatis est, propter pravam indolem, quæ partim ex hæreditaria dispositione & naturali temperamento, partim prava educatione & hinc assumtis malis consuetudinibus ei fere inevitabilis est, multam labem corpori suo inferat. Sua enim natura anima post lapsum corrupta est, non solum in spiritualibus, verum etiam in naturalibus, & non solum erronee agit ratione intellectus, sed prave etiam ratione

B

volun-

voluntatis. Sic ipsum naturale temperamentum sæpius efficax est in turbanda sanitate, ac deteriorandis morbis, quod vero homo pius solus corrigere valet ac emendare, ut inde ex furente Saulo placidus reddatur Paulus: corrigere porro valet non suis sed divinis viribus pravos mores ac malas consuetudines, quæ ex educatione in homine naturali sæpius altas agunt radices ac magnum momentum in turbanda sanitate conferunt. Et quemadmodum tria summa sunt voluntatis vitia, quæ naturalem hominem sub imperio suo habent, nempe avaritia, ambitio, & voluptas, ita & his pietas unica mederi potest. Sed dices forte, quid hoc ad Medicinam? O multum sane, quantas enim turbas hæc vitia tam in sanitate quam morbis producere valeant, ex sequenti tractatione passim elucescet.

§. VI.

Postquam igitur breviter ostensum fuit qualem nexum & convenientiam pietas in sanitate conservanda habeat ratione ipsius animæ; jam etiam idem monstrabo ratione legitimi usus rerum non naturalium. Hæ dicuntur illæ, sine quibus vita nostra consistere non posset, & sex vulgo numerantur, nimirum aër, cibus & potus, quies & motus, somnus ac vigiliæ, excreta & retenta, ac animi pathemata. Licet vero inter has res quædam sint, quæ prava sua indole citra culpam hominis eidem damna inferre possunt, v. gr. aër impurus, malignus, pestilentialis, cibi venenati &c. attamen plurimæ ita sunt comparatæ, ut, si noceant, noxæ suæ fundamentum in ipsius hominis prava voluntate habeant. Hoc ut eo melius elucescat, considerabo singulas, & ab animi pathematibus initium faciam.

§. VII.

§. VII.

Animi affectus in se spectati, moderati, adeo sunt necessarii, ut ne vita quidem nostra sine illis possit consistere, si enim v.gr. non adesset amor, nec adversa tolerarentur; nisi adesset zelus, nec ea quæ nocent averterentur; nisi adesset timor, nec locum inveniret providentia, & sic vita non diu vigeret. Eo sensu noluit Deus animam nostram sine affectibus esse: quapropter etiam actiones christianæ mox in amore, mox in timore aliisque affectibus ut peragantur, divina jubet voluntas. Ast proh dolor! cum post generis humani miserandum lapsum anima tota corrupta fuit; evenit ut hodiernum adfectus plerumque nil nisi effectus pravi voluntatis ac immaturi iudicii sint. Hinc in vulgus etiam notum est, quanta damna in lædenda sanitate, morbis producendis, alendis, corrumpeendis ac pervertendis producere valeant animi pathemata. Quales noxas ut penitus evolvam, per nonnullas horum pathematum species transcurram, earumque indolem indagabo.

§. VIII.

Iræ nexus cum œconomia corporis medice consideratus, non alius est, quam excessus motuum vitalium, quo fit, ut humores magna copia ad exteriores potissimum partes propellantur, ipse sanguis summa cum vehementia moveatur, hinc ignis & furor quasi ex oculis scintillent, cui accedit etiam partium solidarum irregularis & excessivus motus: & quid nunc ex tanta vehementia & irregularitate motuum vitalium boni sperandum? Etiam si quidem non negandum sit, fieri nonnunquam, ut salutaris effectus ex iracundia in sanitatem hominum resultet:

quemadmodum sic *Valleriola L. II. obs. IV.* Iram paralytico motum; *Bartholinus Actorum Hassn. Vol. I. Cap. 81.* muto loquelam restituisse; *Hildanus Cent. I. obs. 79.* arthriticum sanasse, perhibent: attamen ex particulari & accidentali ejusmodi effectu rarissime eveniente non ad universalem usum valet consequentia. Nonne enim exempla plura in contrarium, de epilepsia, contractura, apoplexia, subitanea morte ab iracundia ortis frequentissima sunt? qualia videantur v. gr. apud *Roderic. a Castro L. 3. de Meteoris microcosmi*, *Horstium Obs. L. 3. obs. 8.* *Sennertum L. V. praxeos*, *Camerarium Memorab. Med. Cent. X. §. 52. aliosque.* Quin, qualem venenatam efficaciam humores ex iracundia contrahant, exempla miserorum infantum ex ira matris epilepticorum, ac symptomata eorum, qui ab iratis aut hominibus aut brutis morfi sunt, abunde testantur.

§. IX.

Terror consistit medice in retropulsione humorum a peripheria corporis ad centrum, ac constrictione partium solidarum: accedit obstupescencia, ut nescii quid faciant homines muti plane & rigidi reddantur. Inde summa nascitur motuum vitalium anomalia: licet enim passim prostant casus, quod per terrorem paroxysmi febrium quartanarum, arthritidis, podagræ, alique morbi profligati fuerint; longe tamen plura & certiora occurrunt exempla, ubi per terrorem palpitationes cordis, lipothymia, syncoptici affectus, epilepsia, apoplexia ac ipsa subitanea mors producta fuit.

§. X.

Curæ, sollicitudines, æumnæ, tristitia magis chronica

nica sunt animi pathemata, quibus motus solidarum æque ac fluidarum partium successive languescit. Quid inde boni expectandum? contabescunt ejusmodi homines ærumnis quotidianis vexati, ac viva quasi redduntur sceleta, humores redduntur spissi, inde morbi oriuntur lenti, gliscentes, occulti, majori pertinacia ægrum excruciantes. Lætitia ac gaudium vero est reassumptio quasi debilis ac languidi hætenus motus, attamen si nimia illa sit, varias quoque morbos, ipsamque subito mortem producere valet, testantibus id variis auctorum observationibus.

§. XI.

Ipse amor inordinatus varios fonticos effectus æconomix vitali inferre potest; præcipue si in ipsam erumpit libidinem. Hæc est quæ legibus divinis contrariatur, & quæ sanitati eximium inferre potest detrimentum. Nonne enim ex libidinosis cogitationibus ac actionibus nimius humorum orgasmus, irregularitates motuum vitalium, imo ipsi maniacy ac furibundi enascuntur affectus? Nonne debilitates partium nervosarum, relaxationes glandulosarum, deperditio virium & alacritatis mentis, emaciationes &c. inde producuntur? quin sæpius impuras ejusmodi actiones talis etiam pœna insequitur, ut affectus scabiosi venerei & honestis detestabiles tandem eveniant.

§. XII.

En igitur! quam fecunda morborum mater sint animi pathemata! hoc cum consideres, mox invenies, quantam convenientiam pietas habeat cum medicina, quod si enim perscruteris; ubi offendis excessum pathematum animi majorem, ac in impiis? imo, ubi dominantur vere? profecto in eosdem tanquam mancipia.

Talis

lis homo, si audit de gubernatione sui ipsius & refrenatione affectuum, vel omnino ludibrio habet, impossibile esse ratus, ut illi coerceantur, vel, dum affirmat & fingit facultatem efficiendi, re ipsa nil aliud præstat, quam ut diabolus beelzebub expellat, id est, vitia atque peccata tantummodo permutet. Pius contra solus regeneratione acquirit vires, malum quod in se sentit, licet non penitus extirpandi, certe tamen subjugandi. Quicquid præterea etiam naturalis homo in domandis affectibus valuerit, (uti de quibusdam philosophis traditur) extra omne tamen dubium positum est, eundem eo pervenire non potuisse, quo pertigisset, si revelatio, illud vere divinum remedium, naturale emendasset, sanctificasset auxissetque, ita ut omnino ex dictis elucescat, quod homo pius magnam præ aliis habeat præcellentiam in conservanda sua sanitate ratione animi pathematum.

§. XIII.

Verum enim vero inter eos antea recensitos animi affectus, terror quibusdam noxia sua in sanitatem efficacia etiam piis videri posset inevitabilis. Attamen, si illum paulo penitius consideremus, inveniemus per attentam experientiam, quod terroris quasi individuus comes, timor aut anxius metus sit, & quod illi, qui scelera aut crimina commiserunt adhuc occulta, ex eo timore, quem, ne facinus suum manifestetur, habent, ex levissima causa non solum terrorem concipiant, verum etiam majora præ aliis inde experiantur damna. Illi vero qui integram gerunt vitam, scelerisque puri sunt, dum abest causa illa atque fundamentum, minime quoque tam facile eidem subjici, nec tantas noxas exinde concipere possunt. Qua-

re

re facile apparet, homines pios, quorum incontaminata conscientia nihil metuit, nilque timet, quorum animus totus voluntati divinæ deditus, omnia infortunia æquo fert oculo; nullatenus tantis calamitatibus ex terrore infanitatem redundantibus esse obnoxios, quam quidem alios.

§. XIV.

Sed convenientiam medicinæ cum pietate in conservanda sanitate etiam ex reliquis rebus non naturalibus, & secundum ordinem, ex aëre demonstrabo. Aërem mortalibus necessarium semper ac inevitabilem esse, ex physiologia constat, non obstante embryonum in utero, ac hominum sub aquis viventium vita. Aër quidem cum legitime sit constitutus, per se nullam sanitati affricat labem; ac cum sæpius per magnum quendam terrarum tractum variis impuris, heterogeneis & mixtioni animali infensis particulis sit stipatus; evenit etiam ut morbos producat malignos, epidemicos, quos certa ratione nec pii effugere possunt. Verum enim vero multoties contingit, ut per ipsam hominum culpam morbi ex aëre contrahantur. Cum parvus & tenax ingruente hyeme in aëre humido, frigido nimbo ruina sanitati minante propria sæpe culpa detrimenta valetudinis sibi contrahat; delicatulus contra illo tempore aëris injurias nimium metuens, fornaci calido affixus quasi hæreat, & sic efficiat, ut necessitate urgente vix tandem domo egressus, statim magnas in sanitate sentiat mutationes; cum tandem & alius aëre abutatur ad sanitatis detrimentum, præprimis per vestitus vitia; (de qua re *conf. Diff. sub Dn. Præside habita, de Vestitus vitiis morborum causis,*) homo pius adminicu-

lis,

lis, & integumentis iusto ordine ac legitimo usu secundum voluntatem divinam adhibitis, effugit omnia ista mala, quæ aliorum propria culpa ex aëre sibi contrahit: ut nihil dicam hoc loco, quod magni utique momenti est, Deum non raro pios singulari protectione sub grassantibus morbis salvos & immunes servare. juxta Psalmum XCI.

§. XV.

Tertia classis rerum nonnaturalium est cibus ac potus. Quemadmodum vero hi a benigno creatore ad conservationem vitæ ac sanitatis hominibus concessi sunt, adeo ut absque iis vita consistere nequeat, exempla enim eorum, qui aliquandiu sine ciborum assumptione vixerunt, ut aliquid extra ordinem naturæ positum, huc non pertinent: ita e contrario nemo negabit, ex illorum illegitimo usu ac luxuria plurimos imo pertinacissimos progenerari morbos. Cibi potissimum nocent vel nimia copia, vel luxuria. Quod prius concernit, suaferunt jam veteres, ac inter illos præcipue Galenus, ne unquam ad plenam satietatem usque edamus: quod ad luxuriam, inter omnes convictum est, simplicem ac tenuem victum omnium optime conducere. Ex quo fundamento quoque factum fuisse viri docti putant, non exclusis quidem aliis concurrentibus causis, ut Patriarchæ tam longam & sanam egerint vitam. Hinc & Germani veteres constantiori frui sunt sanitate, quam nosmet hodiernum: quare etiam Tacitus de moribus Germanorum effatur, quod & simplicibus cibis sine apparatu & blandimentis expellant famem. Conferas quæso laboriosum simplici victu viventem, cum eo, qui nil nisi grata appetit fercula, ac cibis delicatis, aromatizatis & vix amplius inveniundo artificio paratis corpus

pus suum saginat: quis meliori fruetur valetudine? ad ejusmodi luxuriosam diætam inter naturales homines præsertim inclinant voluptuosi & ambitiosi, inclinaret & avarus, nisi impediret respectus pecuniarum, qui supra citatam Galeni regulam optime ac exactissime observaturus, in altero peccat extremo, & id detrahit suo corpori quod tamen necessarium. Sic miseri homines illud, quod iis ad conservationem corporis datum fuit, non nisi ad sui miseriam ac interitum adhibent: cum ille, qui esculenta eo fine eoque ordine, quo data ac præscripta sunt, in sui usum convertit, illud inde deportet emolumentum, ut illibata gaudeat sanitate: *conf. Dn. Præsidis disp. de Longævitate ex Diæta.*

§. XVI.

Pari ratione se res habet cum potulentis: haud enim satis explicari potest, quam fœcunda multorum malorum mater eorum sit abusus, & quidem primo potuum illorum vegetabilium exoticorum apud nos fere epidemicus factus. Non quidem negabo, eorum moderatum usum congruo tempore ac legitimo ordine sanitati, & conservandæ & restituendæ inservire posse; attamen scriptis observationibusque evictum constat, nisi horum decoctorum tam magnus apud nos esset abusus, nec tam irregulares nobis sæpius se sisterent morbi. Conferatur *Dn. Præsidis dissert. de Usu Potus Coffee noxio.* Quid mali porro, quasque turbas cerevisiæ nostræ spissæ, fœculentiæ, lupulatiæ, aromatizatiæ, potusque spirituosi, vinosi, ardentis perverso & inconsulto suo usu sanitati inferre valeant, nemo fere in dubium vocabit, præsertim si ad

C

ebrieta-

ebrietatem, monstrum illud belluini illorum abusus, cogitationibus nostris perveniamus, qua in re hæ paginæ sane nimis sunt angustæ, ut explicentur damna, quæ mox ebrietatem insequuntur vel lento quoque gradu illam excipiunt. *vid. Dn. Præsidis Praxis extemporanea Cas. X. de damnis ex abussu & successiva ardentis spiritus ingestione p. 1013. & Cas. XIII. de ebrietate p. 1033.*

§. XVII.

Refertur quarto ad res non naturales motus & quies. De motu jam Plutarchus ait, quod labores casu obiecti nonnullorum valetudinem exercitatione reddiderint firmiorem. Quis quæso magis ægrotat iis, qui desidem ac otiosum degunt vitam? & quis melius valet, quam qui in sudore faciei panem edit? Nulla sane præstantior medicina & in avertendis & curandis quibusdam morbis, quam labor & sufficiens corporis motus. *vid. Dn. Præsidis disp. de Longævitate a motu corporis.* Sicuti autem labor sanitati confert; ita etiam quies maxime necessaria est, siquidem sine ea pariter vires labefactantur, ac sanitati præjudicatur. Peccant vero homines hac in re vel in excessu vel defectu, vel in utroque simul. Ii, quorum Deus Venter est, deliciis ac otiiis suis humorum inspissationem, obviscationem, obesitatem, torporem aliosque varios ex his propullantes morbos sibi conciliant, dum e contrario alius avaritia impellente, continuis laboribus corpus defatigat, imò pauculas horulas quieti destinatas saltem animo inquieto turbat, quo fit, ut totus habitus corporis emaceratus, oculorum lumina retracta obscurataque, aliaque symptomata ac morbi producti appareant.

Aliud



Aliud hominum genus mox in otio deliciisque laute vivit, mox vero, si falsus iste, quem sibi concipit, honor (point d'honneur) requirit, in laboribus est indefatigabile, iisque subitaneis mutationibus id efficit, ut humoribus per otia copiosioribus ac spissioribus redditis, partes solidas debilitatas ac languidas in nimium reducat motum ac stricture, indeque in periculosas inflammationes, ebullitiones, febres &c. incaute incurrat. Ast homo pius ordinem divinum servans, mediam tenuensque viam, præ hisce, & motus & quietis ratione, illibata gaudebit sanitate.

§. XVIII.

Idem iudicium de somno & vigiliis ferendum est, tanquam quinta classe rerum non naturalium. Nimiis etenim vigiliis vires & lymphatici humores consumuntur, ut nutritio haud commode perfici queat; hinc ejusmodi vigiles semper sunt macilenti, ut & in custodibus, qui nocturnas vigiliis agunt, observare licet: præterea si vigiles ejusmodi noctes cum incertis ac ærumnis consumuntur, & deliria & febres acutæ aliaque fontica mala excitari possunt. Quemadmodum vero hæc cogitationes respiciunt præcipue avaros sordida illa pecuniarum mancipia: ita e contrario, si consideramus voluptuosos, hi nimio somno tempus sæpe consumunt, ast, & somni abusus nocet, reddit enim homines pigros, laborum pertæfatos, ipsumque hebetat animum, ac si uno dicam verbo, ipsos Sardanapalos producit. Tandem sexto inter res non naturales numerantur excreta & retenta: quæ vero proprie ac stricte nostræ meditationi non subjacent, neque peculiari

hoc loco indigent explicatione , ex prioribus quoque fluunt, quæ de his dici merentur. Quicunque enim ordine ac temperantia utitur edendo & bibendo, motu ac quiete, vigiliis ac somno aliisque : ille bene appetit ; qui vero bene appetit, bene etiam digerit ; & qui bene digerit, bene quoque egerit, adeoque etiam sanus vivit.

§. XIX.

Ex hisce hætenus prolatis abunde patebit, quantam præcellentiam homo pius habeat in sanitate sua conservanda tam ratione animæ, quam rerum non naturalium : non minus elucescet, quantas noxas avaritia, ambitio ac voluptas sanitati inferre possint. Ex quo sequitur, quod horum vitiorum consideratio medica minime sit inutilis. certissimum enim est, quod si homines secundum sanam duntaxat rationem viverent, longe minor morborum illos prementium esset numerus : jam vero cum ex Theologia ceu verum supponimus, quod homo sibi relictus vitia voluntatis ante dicta penitus corrigere nedum abolere nequeat : hæc vero vitia in pervertenda sanitate multum efficere, supra ostendimus : quis inde non videt optimam convenientiam Theologiæ practicæ cum Medicina. Sed ulterius prosequemur hanc materiam, & paucis ostendemus, pietatis utilitatem in præservandis ac curandis morbis.

§. XX.

Cognitum est, & a rerum medicarum scriptoribus abunde evictum, quod plurimi sint morbi, qui data quadam sæpius levissima occasione, iterum recrudescunt, ac pristinam, imo nonnunquam deteriorem ludunt scenam.

Qua-

Quare etiam datae sunt a peritis medicis regulæ, quibus observatis, ejusmodi morbi præservantur. Quum igitur diximus, eam esse pietatis cum medicina convenientiam, ut etiam influxum habeat in morbos præservandos; videndum est, qua ratione id contingat. Scilicet hoc sensu præservatio morbi nihil est aliud, quam evitatio causarum occasionalium, ex quibus morbi recrudescent. Quæ vero sunt hæ causæ occasionales? omnium sane consensu nullæ fere aliæ, quam abusus rerum non naturalium, & inter eas præcipue animi pathematum. Sic enim, si quis v. gr. febre quadam intermittente laboravit, eaque superata vel stomachum nimia ciborum faragine replet, vel iracundiæ aut mœrori indulget; quid frequentius est, quam ut ista febris recurat? Si porro quis malo hypochondriaco detentus, ab illo penitus liberatus fuit, dein vero iterum vitæ otiosæ, sedentariæ, tristitiæ, mœroribus se tradit, vix aliter fieri potest, quin pristino iterum corripiatur malo. Si igitur verum est, ab usum rerum nonnaturalium ad morborum recrudescentiam contribuere, verum etiam est, quod ille omnium optime morbos præservare poterit, qui optime rebus non naturalibus utitur. Hoc artificium vero neminem melius callere, quam pios homines, ex superius commemoratis patebit.

§. XXI.

Adhuc superest significatus præservationis præcipue in morbis malignis, contagiosis, populariter grassantibus, ubi præservatio denotat illam providentiam, qua summo studio cavere nobis adnitimur, ne corripiamur il-

lo grassante morbo, qui plurimos corripuit. Multæ jam artes sunt excogitatæ, quarum auxilio morborum talium malignorum pestilentialium nimiam stragem præservare intendimus. Omnibus vero illis palmam præripiet animus intrepidus ac firmus, videmus enim illos, qui nimio metu, ac anxia imaginatione laborant, omnium facillime morbis his affici. Ecquis autem constantiore animum habere potest homine pio: hic se totum tradit divinæ voluntati; hinc nec morbum nec mortem timens, aliquando medios inter ægrotos ac eorum tumulos officio sibi demandato fungitur, nec tamen morbo grassante corripitur. Interim nec laudamus eorum audaciam, qui Deum magis tentantes frivole sine necessitate cuicunque se tradunt periculo: voluit enim Deus, ut ad sanitatem conservandam observemus etiam regulas, quas sana ratio ex attenta experientia suppeditat. *conf. B. Luzherus in Genes. XIII. 8. 9.* Gott will nicht, daß jemand an seinem eigenen Leib ein Mörder werden soll, sondern will, daß man denselbigen schonen, ja auch darnach regieren und sich halten soll, - damit er seinem Beruff und Dienste des Nächsten genugsam seyn kan. *vid. Dn. Præsidis Jurisprud. med. Tom. I. Part. I. c. 16. de autochiria medica.*

§. XXII.

Tandem vero etiam pietatis cum medicina nexum in ipsis morbis facilius superandis ostendam. Si ut Christiani morborum curationes intueamur, reperiemus, illas tribus potissimum absolvi momentis, nempe 1) benedictione divina; 2) medicaminibus, 3) legitimo usu rerum non naturalium. Nam adhibeas omnem diætam, omne

omne regimen, omnia medicamenta, panaceas, polychresta, universalia, omnem totius pharmaciae panopliam, his omnibus ne levissimum quidem curabis morbum, nisi divina adfuerit benedictio, quam vero si tibi polliceri potes, durissima propelles mala. Hinc ante omnia ab ægro divinum auxilium submissis expetendum est precibus. *vid. Heinrich Müllers Erquick-Stunden 72 Betrachtung von der Krafft der Arzneyen durch Gottes Wort und Seegen.* Hoc nobis Salvator noster sub ipsius exemplo demonstravit: ille enim ipse, quando male habentes curare voluit, supplex prius divinum sibi expetiit auxilium; dein, ipsi etiam ægri debebant illum precibus implorare. Hinc etiam Regi Assæ Chronicor. Cap. XVI. vitio vertitur, quod, cum pedibus laboravit, non Dei auxilium quæsiverit, sed solis medicis confusus fuerit: quare etiam eam ob causam illum mortuum fuisse legimus. Contra vero notatu dignum est Regis Hiskiae exemplum ex Esaia Cap. XXXVIII, qui, cum adeo periculoso laboraret morbo, ut etiam mors a propheta Esaia ipsi fuerit annunciata; precibus tamen ad Deum fuis id effecit, ut pristinae sanitati restituere-
tur, & aliquot adhuc anni vitæ suæ adderentur. Quare etiam *Augustinus* dicit: *qui sine Salvatore salutem vult habere, non sanus sed æger, non prudens sed stultus in assidua laborabit ægitudine.* Et *B. Lutherus* in Cap. XXXVIII. Syrac. v. 10. & 13. *Erstlich werde fromm, zum andern laß vor dich bitten, zum dritten brauche des Arztes. Beten hilft mehr, als arzeneyen, und der Priester thut mehr, als der Arzt, aber man ist nicht gern fromm,*

fromm, darum achtet man des Betens und der Priester weniger. Certe enim ni Deus adfuerit, viresque infuderit herbis, quid rogo Dictamnus, quid panacea prodest? Quodsi ergo divinum auxilium in morbis debet implorari, quis quæso illud meliori fiducia sibi polliceri poterit, quam homo pius, qui jam certo persuasum habet, sibi Deum esse propitium.

§. XXIII.

Expetita itaque divina benedictione ad ipsum medicamentorum usum pergendum est. Velle Deum ut præter ipsius implorationem adhibeantur medicamina; non solum in multis sacræ scripturæ locis expressis indicatur verbis, verum etiam exemplis corroboratur. Sic certe citatus Hiskias potuisset omnipotenti Fiat sanari, ast hoc non fecit Deus, sed Esaïas debuit emplastrum parare ac loco affecto applicare. Ita quoque ipse Salvator, cum per solum *Ἐφάτα* potuisset muto sermonem; per solum Surge & ambula claudicanti vim ambulandi, &c. restituere: nihilo tamen minus ejus Sapientiæ placuit in nonnullis affectibus adhibere materialia subjecta, quæ tamen effectum salutiferum haud præstiterunt, sed ipsius divina benedictio. Hinc non pietati adscribere mus, si quis putaret, se ex sola benedictione divina sanitatem recuperaturum; eamque ob causam omnium remediorum usum respueret. Alii dicere possent, unicuique vitæ suæ terminum esse positum; hinc si iste, quo laborant, morbus non esset ad mortem, se, licet nullis uterentur medicaminibus, tamen sanitatem fore recuperaturos: si autem mortis adesset hora, omnia incassum

caſſum adhiberentur medicamina. Verum quidem eſt, quod contra vim mortis, nec in hortis nec in Chymicorum laboratoriis ſit medicamen: ſed quis quæſo tibi revelavit, hunc tuum morbum ſimul mortis horam involvere? Reſpondebis, ſi non involvit, ſine medicamentis reconvaſcam; ſi involvit, quid illis opus? Aſt, nequidem jam diſquiram, an non morbus, qui vitæ tuæ terminum non involvit, negligentia tua fieri poſſit lethalis: ſed id tantum urgebo. Ponam, morbum tuum non eſſe ad mortem; nonne vero melius erit, eundem breviori tempore, minori moleſtia ac mitigatis doloribus ſuperare, quam illius acerbia per longum tempus vexari? At, prius efficiamus medicamentis. Licet enim non negandum ſit, benignam naturam ſæpius quosdam morbos ſponte proſtigare, id tamen non de omnibus valet, & ſi quoque valeret, melius tamen ſemper ſuccedet negotium, ſi naturæ miniſter illi auxiliatrices præbeat manus.

§. XXIV.

His in parentheſi dictis, ad tertium momentum, quod morborum curationes abſolvit, pervenimus, quod eſt legitimus rerum non naturalium uſus. Quemadmodum enim ille in ſanitatis conſervatione magni uſus eſt; ita incredibile dictu, quanta efficacia in iſtis morbis medicamentorum vim adaugeat. Quid autem e contrario magis corruptos, complicatos, chronicos ac pertinaces morbos reddit, quam diæta inordinata, regimen incongruum, ac præcipue animi pathemata? Hæ ſunt larvæ, quæ morbis plane aliam reddere poſſunt faciem, ac medico experientiſſimo valde imponere. Sic ſæpius contingit, ut morbi indole ſua plane benigni ex animi pathemati-

D
bus

bus ita invertantur, ut speciem malignorum adipiscantur.

§. XXV. Præcipue vero morborum curationem difficiliorem reddere possunt ac intricatiorem mali mores, homo enim illis indulgens, impatientia, morositate, inquietudine aliisque voluntatis vitiis, experientia teste, semper placidum pervertit morbi decursum, illumque facit intricatiorem ac difficiliorem. Sic, ut aliquos tantum commorem, fieri potest, ut avarus parcens expensis, nec medicamenta nec diætam ægro convenientem adhibeat, aut si ex metu mortis iisdem utatur, semper tamen curis ac sollicitudinibus afficiatur. Meticulosum autem & ærumnosum talem animum morbum reddere deteriore, experientia constat. Ita quoque voluptuosus haud didicit adversa ferre, hinc nec dolores tolerare valens, summa corripitur impatientia; hinc jectitabundus salutare excretionem turbat; quid? quod nonnunquam gulæ detrudere nolens, nec ab illis cibis abstinere valet, qui eximum morbo minantur detrimentum. Alius denique, quemadmodum minime parcendo valetudini, (qua in re falso gloriam quærit) sæpius sibi contraxit morbum, ita quoque pariter in morbo ipse sibi nocet, dum ante plenariam curam post aliqualem tantummodo morbi remissionem, hunc nihili amplius faciens, sæpissime ea audet, quæ omnia iterum pervertunt atque corrumpunt.

§. XXVI. Ast homo pius sanitatem æstimat, & ceu magnum bonum, quantum in se est, conservare studet: hinc quoque medicum honorat, quem Deus eum in finem creavit, ut sanitati succurrat; hinc etiam præceptis illius obedientiam præstat, ac omnia, quæ morbo remoram ac sanitati detrimentum causantur, cane pejus ac angue fugit. Sin-

gula-

gularis porro illius virtus, qua multum proficit in debellandis vel saltem facilitandis morbis est patientia. Certus enim est, quod morbos qui ipsum corripunt, non sola propria culpa sibi contraxerit, sed simul ex paterno Dei amore ceu lenem castigationem ac virtutis explorationem illos accipit, adeoque tolerat summa cum patientia calamitatem suam. Et quam præstans hoc est remedium in morbis dolorosis, spasticis, arthriticis, in affectibus inflammatoriis ut & febribus acutis &c. ubi dolor aut molestus æstus nimium torquet! Notum enim est, quod in ejusmodi morbis, clamores, angores, ejulatus, actiones inquietæ, jectitationes impatientes &c. multum contrariantur curationi. Homo pius porro morbos chronicos non minus facilius superat, constat enim, illos optime per congruam diætam, bonum regimen, ac temperantiam in animi affectibus eradicari posse; quæ cuncta omnium optime præstare valet pius. Poterit quoque & acutos febriles ac inflammatorios morbos superare facilius, dum bonum regimen, specificum februm acutarum medicamen, magna cum patientia exacte servabit. Quin & in ipsis malignis, quorum difficilem curationem ac lethalem eventum sæpius anxia imaginatio, ac metus mortis producit, summam habebit præcellentiam, dum remissionis peccatorum suorum sibi bene conscius, cum Deo reconciliatus nihil amplius timet.

§. XXVII. Sed subsistam adhuc paululum in illis morbis, quorum periculosa symptomata ancipitem infaustum & lethalem eventum minantur. Consideremus, si his accedunt tormenta conscientiae; quid quæso efficietur? Si adhuc vegeti fruamur sanitate, & peccatorum reminiscen-

tia, ac divina vindicta menti manifestatur: quantas jam tum motuum vitalium experimur alterationes? quas optime expressit sacer codex, quando passim de tali homine dicit: Die Gebeine desselben erschrecken, er werde müde von Seuffzen, seine Gestalt verfalle, seine Gestalt werde alt, seine Krafft verfalle, und seine Gebeine verschmächeten, es sey nichts gesundes in seinem Leibe, seine Lenden verdorreten, sein Herz bebe &c. &c. Dum vero hujusmodi conatus conscientiae homo saepius in sanitatis statu rejicit, iisque resistit: contingit ut praeter opinionem ancipiti quodam casu & morbo oppressus deinceps tanta vehementia accusationes conscientiae, fluminis instar, erumpant, quo motus vitales simul adeo alterantur, ut ipsa saepius vita, forte conservanda, hisce aboleatur. Hanc conscientiae fluctuationem, sollicitudinem atque angorem omnes homines, qui contra ejusdem leges agunt, experiri debent, & quamvis quidam fuerint, qui hanc inquietudinem abolituri, Dei existentiam negarunt, quoniam testimonia suae conscientiae in ea fundari perceperunt; ante ultimum vitae suae terminum vel nolentibus vel volentibus ipsis tamen manifestatum se dedit, & illos hoc tribunal conscientiae omnino agnoscere. Ast homo pius, tantum abest ut ejusmodi conscientiae tormentis in tranquillitate conturbetur, ut potius dulcedinem divinae gratiae atque auxilii sentiat, quae magnum ipsi confert emolumentum in ipsius morbi curatione, lætatur enim illa, & vires morbo prostratas recuperat.

§. XXVIII. Inter ea momenta, quae utilitatem & influxum pietatis in medicinam testantur, referendus etiam est partus. Est ille actus tam ancipitis saepe eventus, ut omni mo-
men-

mento mors præfens sit. Nihil in tali statu, feliciorum eventum producere valet, quam tranquillitas mentis & reconciliatio cum Deo. Impatientia vero, inquietudo, ejulatus motus ad partum pertinentes reddunt irregulares, quorum irregularitatem atque anomalam, si conscientiae tormenta accedunt, eximie augent. Et sic propria sæpe culpa vitæ suæ periculum faciunt miseri homines, qua via pius homo illud non incurrit, & si aliquando jam obstrictus hæret, facilius hoc vel illo modo se extricare scit, calamitatem saltem ipse non adauget, quemadmodum de illis hætenus a me expositum est.

§. XXIX. Quod si vero etiam ad ipsam mortem ventum sit, quem nemo mortalium effugere potest, quis majori felicitate eam superabit, quam homo pius. Nihil quidem est, quod adeo reformident homines quam mortem & reapse sæpius duriores imo acerbissimam experiuntur, idque maxime pro diversitate temperamentorum: sic melancholici pro dura ac pertinaci sua indole duram habent mortem; *Sie sterben eines schweren Todes*, Cholerici contra præcipiti ac impetuosa abripiuntur morte. Et si causam hujus rei perpendimus, aliquando non alia est, quam hujus vitæ amor & æterni cruciatus, quem conscientia prænunciat, metus. Dum autem homo pius nihil magis optat, quam ut terrenis his vinculis solvatur, & æternam requiem nanciscatur; summo gaudio hanc vitam deserit, adeoque mors ipsi est placidus somnus, æterni gaudii initium, ac omnium calamitatum, quæ vitam mortalium premunt, exoptatissimus

F I N I S.

NOBILISSIMO DOMINO CANDIDATO

S. P. D.

P R Æ S E S.

N*E sitis ut alieni appetentes, æquum monitum est Apostolicum I Petr. IV. 15. ast quando Medicus condigne & juxta S. S. normam de rebus Theologicis differit, & vita Theologo digna inclarescit, ut luceat ejus lux apud homines, ut illius recte (non spurie) facta videntes, colaudent patrem, qui est in cælis Matth. V, 16. tunc non rei alienæ se immiscet, quia cognitio & exercitatio pietatis aut Theologica omnibus hominibus a Mose, Psalmista, Prophetis, Christo & Apostolis demandata est, & utinam totus Jovæ populus, Ejus spiritu afflatus vates sint. Num. XI. 29. Clerici vero facile judicium illud, quod alieni appetentes sint, in se devolvunt, quando præmatura officiositate sine ulla necessitate exercitio Medicinæ se immiscunt; nemo militans sese vitæ negotiis implicat. II Timoth. II. 4. conf. Dannhauer Lact. Catech. Part. II. Conc. 39. p. 326. Casp. Bravo de Medic. dogmat. præst. p. 89. sq. ventilat hanc quæstionem: Utrum de jure communi Clericis liceat exercere Medicinam: vid. judicium de Pastoribus Medicinam exercentibus Lentilii Miscell. Med. Pract. p. 608 -- 617. Rhetii disp. de Medicis cap. I. §. 8. Rei enim alienæ se immiscens culpa non caret L. 36. ff.*

de

de R. I. Discite vos Medici, Pietatem & discite versum:
esse decet doctum, sed magis esse pium; fusius de hoc
themate egi in *præfatione de Luca Medico* Medicinæ Theo-
logicæ a me ante aliquot annos editæ præfixa. Et Tu
CLARISSIME CANDIDATE recte agnovisti
Pietatem ad omnia utilem esse atque necessariam. Fortas-
sis plus una vice ex ore meo audivisti, me velle utpote
Theologiæ nec Baccalaureum, nec Magistrum, nec Docto-
rem, sed studiosum, vitam cum morte mutare: Tu itaque
laudando & probando conatu *Medicinæ convenientiam cum*
Theologia Practica inaugurali hoc Specimine explicasti:
insuperque indolem Tuam probam ac ingenuam decla-
rasti: combinaſti egregio tuo exemplo & studiorum
curriculo, quo nobis innotuisti, Theologiam Practicam
& Medicinam, nec aliquam occasionem indies plus ultra in
utroque stadio procedendi & proficiendi prætermiſiſti:
indefeſſo ſtudio huc uſque Medicinam excoluiſti inſuper-
que ſolidos profeſtus acquiſiſti, nec primis labris aut ſu-
perficiarie & perfunctorie guſtaſti & tractaſti, quæ ad
naturalis ſalubritatis cognitionem, tutelam & promotio-
nem ſpectant: Gratulor Tibi de proſpero vitæ Acade-
micæ exitu, de pulchro Scientiarum theſauro, & pro-
meritis honoribus Doctoralibus; Gratulor mihi de au-
ditore optimæ famæ ac ſpei, Gratulor Patriæ de Medi-
co pio, docto & ingenuo, Gratulor Tuis de felicitate &
divina benedictione, quæ impoſterum bona de Te Tuis-
que conatibus promittit omina: & quemadmodum *pie-
tas omnium potentiffima eſt* Sap. X. 12. ita te ipſum ad ean-
dem exerceto, quia promiſſionem habet & præſentis &
futuræ vitæ. Comitetur probos tuos labores cœleſtis
illa

illa benedictio prosperrimis successibus: quod reliquum
est, quia in præsentī Specimine Theologiæ Practicæ men-
tionem fecisti, ita pro Spirituali propria Tua ædificatio-
ne *B. Porstii Theol. Practicam Viatorum*, ast pro ulterio-
ri artis Medicæ Cultura, pii Medici *Sennerti Opp. Med.*
de reliquo etiam *Boylei Medici Scripta Theologica* Tibi
commendo: & ita sub perenni divina benedictione &
directione integra animi ac corporis firmitate & sanita-
te frui. Dab. Halæ Magdeb. IX Kalend. Januarii
A. O. R. clō Idcc xxxiii.

S grüne Phœbi Ruhm und blühe dessen Glücke
Durch dessen Fleiß und Kunst ein ächtes Meister-
Stück

Heut unser Saal = Athen mit neuer Lust erfreut,
Und Hygiænen's Lob auf seltne Art verneut.
Ich meine Dich mein Freund! das innigste Vergnügen
So Deiner Tugend Glanz und Dein gelehrtes Siegen
In meiner Brust entzündt, belebet Kiel und Mund,
Und macht Dir diesen Schluß und Prophezeiung kund:
Wer so, wie Rochens Geist, den Purpur würdig zieret,
Und wen Verdienst und Kunst zum Ehren = Tempel führet,
Dem wird und müsse es beständig wohlergehn:
Weil Tugend Wiß und Glück' stets beyeinander stehn.

Mit diesen wenigen Zeilen wolte dem Herrn Doctorando als
seinem Hochwёрtesten Freunde und Gönner seine schuldig-
ste ergebenheit eilsfertig doch in aller aufrichtigkeit bezeugen.

P. C. H. D.

